

Heilsuvöruhús á Reykjanesi fyrir milljarð króna:

## HB GRANDI, SAMHERJI , VÍSIR, ÞORBJÖRN OG CODLAND SAMEINA KRAFTA SÍNA Í HEILSUVÖRUHÚSI

Fjögur af stærstu sjávarútvegsfyrirtækjum landsins og frumkvöðlafyrirtæki hafa undirritað viljayfirlýsingu um að reisa Heilsuvöruhús á Reykjanesi þar sem þróun og framleiðsla á vörum unnum úr hliðarafurðum sjávarútvegs fer fram. Heildarkostnaður verkefnisins er áætlaður um einn milljarður íslenskra króna.

Heilsuvöruhús er í eigu HB Granda hf, Samherja hf, Vísis hf, Þorbjarnar hf og Codlands ehf og er áætlað að það taki til starfa í byrjun árs 2018.

Í fyrstu er reiknað með að aðalframleiðsluvara Heilsuvöruhúss verði kollagen prótein sem notað er í heilsufæði, fæðubótarefni og lyf. Við framleiðslu kollagensins verður notast við græna orku úr orkulindum Reykjanesskaga og þannig verður tryggt að um afar vistvænar afurðir verði að ræða.

*„Við höfum lokið frumhönnun Heilsuvöruhúss og allir helstu kostnaðarþættir liggja fyrir, svo sem tækjakaup og uppsetning. Þarna sameina fjögur af stærstu sjávarútvegsfyrirtækjum krafta sína, fyrirtæki sem hafa mikla reynslu af fiskveiðum og ráða yfir skipaflota og aflaheimildum til að afla Heilsuvöruhúsi grunnhráefnis og um leið auka nýtingu og verðmætasköpun hliðarafurða í sjávarútvegi,“* segir **Tómas Þór Eiríksson, framkvæmdastjóri.**

Ljóst er að þeir aðilar sem koma saman í þessu verkefni geta með þessu nýsköpunarverkefni skapað mikil verðmæti úr hliðarafurðum á borð við fiskroð, sem hingað til hefur verið lítt eða ekkert nýtt. Hröð þróun hefur orðið í framleiðsluaðferðum kollagens á síðustu árum og eftirspurn eftir vistvænum afurðum á þessu sviði hefur aukist jafnt og þétt um allan heim.

*„Þau fyrirtæki sem sameinast um þetta telja að hægt sé að samnýta þá sérþekkingu sem þarna er til staðar og skapað verðmæti sem skila aðgangi að nýjum mörkuðum. Þarna skapast hátæknistörf og þróun fullvinnslu í sjávarútvegi heldur áfram af krafti,“* segir Tómas Þór.

Áætlað er að skóflustunga að Heilsuvöruhúsi fari fram í vor og eins og áður sagði má reikna með að Heilsuvöruhús taki til starfa fyrri hluta árs 2018.

### **Nánari upplýsingar veitir:**

Tómas Þór Eiríksson, framkvæmdastjóri Codlands ehf í [tomas@codland.is](mailto:tomas@codland.is) eða 860 0985